

四庫全書

集部

欽定四庫全書

御定全唐詩錄卷五十七

權德輿

德輿字載之畧陽人起家河南幕府德宗聞其名
召為左補闕知制誥中書舍人歷禮部侍郎三典
貢舉元和五年以禮部尚書同平章事罷守本官
後為東都留守又鎮興元卒贈左僕射諡文德輿
三歲能變四聲四歲能詩賦嗜讀書無寸景暫倦

其文雅正而弘博羽儀朝行三十載醞藉風流為
時稱嚮

古體詩

古意

家人強進酒酒復能忘情持杯未飲時衆感紛已盈明
月照我傍庭柯振秋聲空階白露下枕席涼風生所思
萬里餘水濶山縱橫佳期憑夢想未晚愁鷄鳴願得一
心人當年歡樂并長筵映玉俎素指彈秦箏暖睇呈巧

笑惠音激淒清此願良未果永懷空如醒

與沈十九拾遺同遊棲霞寺上方夜於亮上人院

會宿

攝山標勝絕暇日諧相矚縈紆松路深繚繞雲巖曲重
樓回樹杪古像鑿山腹人遠水木清地深蘭桂馥層臺
聳金碧絕頂摩淨綠下界誠可悲南朝紛在目焚香入
古殿待月出深竹稍覺天籟清自傷人世促宗雷此相
遇偃放隨所欲清論月輪低間吟茗花熟一生如土梗

萬慮相桎梏永願事潛師窮年此棲宿

月夜江行

扣舷不能寐浩露清衣襟彌傷孤舟夜遠結萬里心幽
興惜瑤草素懷寄鳴琴三奏月初上寂寥寒江深

豐城劔池驛

龍劔昔未發泥沙相晦藏向非張茂先孰辨斗牛光神
物不自達聖賢亦彷徨我行豐城野慷慨心內傷

晚渡揚子江卻寄江南親故

返照滿寒流，輕舟任搖漾。支頤見千里，烟景非一狀。遠
岫有無中，片帆風水上。天清去鳥滅，浦迴寒沙漲。樹晚
疊秋嵐，江空翻宿浪。胸中千萬慮，對此一清曠。回首碧
雲深，佳人不可望。

早發杭州泛富春江寄陸三十六公祐

候曉起徒馭，春江多好風。白波連青雲，蕩漾晨光中。四
望浩無際，沈憂將此同。未離奔走途，但恐成悲翁。俯視
觸餌鱗，仰目凌霄鴻。纓塵日已厚，心累何時空。泛泛此

人世所向皆樊籠唯應杯中物醒醉為窮通故人元圃
姿瓊樹分青葱終當北山去共結蘭桂叢

古樂府

光風淡蕩百花吐樓上朝朝學歌舞身年二八墜侍中
幼妹承恩兄尚主綠窻珠箔繡鴛鴦侍婢先焚百和香
鶯囀日出不知曙寂寂羅幃春夢長

妾薄命篇

昔住邯鄲年尚少只是嬌羞弄花鳥青樓碧紗大道邊

綠楊日暮風裊裊嬋娟玉貌二八餘自矜顏色花不如
麗質全勝秦氏女葉砧寧用專城居南陌東城詎來往
青蛾紅粉全堪賞玉樓珠箔但間居南陌東城詎來往
韶光日日看漸遲標梅既落行有時寧知燕趙娉婷子
翻嫁幽并遊俠兒年年結束青絲騎出門一去何時至
秋月空懸翡翠簾春憚嬾卧鴛鴦被沙塞經時不寄書
深閨愁獨意何如花前拭淚情無限月下調絃恨有餘
離別苦多相見少洞房愁夢何時曉閒看雙燕淚霏霏

靜對空牀魂悄悄鏡裏紅顏不自禁
陌頭香騎動春心
為問佳期早晚是人人總解有黃金

秋閨月

三五二八光如練
海上天涯人共見
不知何處玉樓前
乍入深閨玳瑁筵
露濃香徑和愁坐
風動羅帷照獨眠
初卷珠簾看不足
斜抱瑩篋未成曲
稍映妝臺臨綺窻
遙知不語淚雙雙
此時愁望如何極
萬里秋天同一色
靄靄遙分陌上光
迢迢對此閨中憶
早晚歸來歡燕同

可憐歌吹月明中
此夜不堪腸斷絕
願隨流影到遼東
近體詩

長相思

少小別潘郎
嬌羞倚畫堂
有時裁尺素
無事約殘黃
鶻語臨妝鏡
花飛落繡牀
相思不解說
明月照空房

送映師歸本寺

還歸柳寺去
遠遠出人羣
苔甃桐花落
山窻桂樹薰
引泉通絕澗
放鶴入孤雲
幸許宗雷到
清談不易聞

送王鍊師赴王屋洞

稔歲在芝田歸程入洞天白雲辭上國青鳥會羣仙自
以碁消日寧資藥駐年相看話離別風馭忽泠然

晚秋陪崔閣老張秘監閣老苗考功同遊昊天觀
時楊閣老新直未滿以詩見寄斐然酬和有愧
燕音

方駕遊何許仙源去似歸紫迴留勝賞瀟灑出塵機泛
菊賢人至燒丹姹女飛步虛清晚籟隱几吸晨輝竹徑

琅玕合芝田
沉瀝晞銀鈎
三洞字瑤笥
六銖衣麗句
翻紅藥佳期限
紫微徒然一
相望郢曲和
應稀

送工部張曹長大夫奉使西蕃

殊鄰覆露同
奉使小司空
西候車徒出
南臺節印雄
吊詞將渥命
導譯暢皇風
故地山河在
新恩玉帛通
塞雲凝廢壘
關月照驚蓬
青史書歸日
翻輕五利功

酬裴傑秀才新櫻桃

新果真瓊液
來應宴紫蘭
圓疑竊龍領
色已奪雞冠
遠

火微微辨殘星隱隱看茂先知味易曼倩恨偷難忍用
烹騂酪從將翫玉盤流年如可駐何必九華丹

田家即事

間卧藜牀對落暉倏然便覺世情非漠漠稻花資旅食
青青荷葉製儒衣山僧相勸期中飯漁父同遊或夜歸
待學尚平婚嫁畢渚烟溪月共忘機

和司門殷員外早秋省中直夜寄荆南衛端公

共嗟王祭滯荊州才子為郎憶舊遊涼夜偏宜粉署直

清言遠待玉人酬
風生北渚烟波濶
露下南宮星漢秋
早晚得為同舍侶
知君兩地結離憂

待漏假寐夢歸江東舊
居因寄惠閣黎茅處士

十年江浦卧郊園
閒夜分明結夢魂
舍下烟蘿通古寺
湖中雲雨到前軒
南宗長老知心法
東郭先生識化源
覺後忽聞清漏曉
又隨簪佩入君門

送張閣老中丞持節冊吊回鷗

旌旆翩翩擁漢官
君行當得遠人歡
分職南臺知禮重

綴書東觀見才難金章玉節鳴騶遠白草黃雲出塞寒
欲散別離唯有酒暫煩賓從駐征鞍

玉臺體十首

隱映羅衫薄輕盈玉腕圓相逢不肖語微笑畫屏前
知向遼東去由來幾許愁破顏君莫怪嬌小不禁羞
樓上吹簫罷閨中刺繡閑佳期不可見盡日淚潺潺
睡足珊瑚枕魂銷玳瑁牀羅衣不忍著羞見繡鴛鴦
君去期花時花時君不至簷前雙燕飛落妾相思淚

空閨滅燭夜羅幌獨眠時
淚盡腸欲斷心知人不知
秋風一夜至吹盡後庭花
莫作經時別西隣是宋家
獨自披衣坐更深月露寒
隔簾腸欲斷爭敢下階看
昨夜裙帶解今朝蟬子飛
鉛華不可棄莫是橐砧歸
萬里行人至深閨夜未眠
雙眉燈下掃不待鏡臺前

敷水驛

空見水名敷秦樓昔事無
臨風駐征驛聊復捋髭鬚

玉臺體

嬋娟二八正嬌羞日暮相逢南陌頭試問佳期不肖道
落花深處指青樓

雜興

琥珀尊開月映簾調絃理曲指纖纖含羞歛態勸君住
更奏新聲刮骨鹽

巫山雲雨洛川神珠襟香腰穩稱身惆悵妝成君不見
含情起立問傍人

舟行夜泊

蕭蕭落葉送殘秋
寂寞寒波急暝流
今夜不知何處泊
斷猿晴月引孤舟

戲贈蘇九

白首書窻成鉅儒
不知簪組遍屠沽
勸君莫問長安路
且讀魯山于菴于

贈天竺靈隱二寺主

石路泉流兩寺分
尋常鐘磬隔山聞
山僧半在中峯住
共占清猿與白雲

太常寺宿齋有寄

轉挑挑燈候曉鷄
想君應歎太常妻
長年多病偏相憶
不遣歸時醉似泥

武元衡

元衡字伯蒼河南緱氏人祖平一有名舉進士憲
宗時拜門下侍郎同中書門下平章事後詔為劍
南節度使八年召還秉政淮蔡用兵王承宗上疏
請赦吳元濟使人白事中書悖慢不恭元衡叱去

承宗怨數上章誣詆未幾入朝出靖安里第夜漏未盡為賊所害

元衡善為五言詩好事者傳之往往被於管絃嘗夏夜作詩云夜久喧暫息池臺惟月明無因駐清景日出事還生明日遇害初元和八年元衡自蜀一再輔政時太微犯上相歷執法占者言今之三相皆不利始輕未重月餘李絳以足疾免明年十月李吉甫以暴疾卒至是元衡為盜所害年五十八

始元衡與吉甫齊年又同為宰相及出鎮分領揚
益及吉甫再入元衡亦還吉甫先一年以元衡生
月卒元衡後一年以吉甫生月卒吉凶之數若符
會焉先是長安謠曰打麥麥打三三三既而旋其
裏曰舞了也解者謂打麥者打麥時也麥打者謂
暗中突擊也三三三謂六月三日也舞了也謂元
衡之卒也

元衡卒劉禹錫作佳人怨二章云寶馬鳴珂踏曉

塵魚文匕首犯華茵適來行哭里門外昨夜華堂
歌舞人又云秉燭朝天遂不回路人彈指望高臺
墻東便是傷心地夜夜秋螢飛去來

晁公武云唐世工詩宦達者高適宦達工詩者元
衡

古體詩

獨不見

荆門一柱觀楚國三休殿環珮儼神仙輝先生顧盼春

風細鬢舞明月高堂宴夢澤水連雲渚宮花似霰俄驚
白日晚始悟炎涼變別堯異波濤離鴻分海縣南北斷
相聞嘆嗟獨不見

旬假西亭寄熊郎中

旬休屏戎事涼雨北窓眠一夜江城夢萬里繞山川草
木散幽氣池塘鳴早蟬妍芳落春後旅思生秋前紅槿
燦庭艷綠蒲繁渚烟行歌獨酌謠坐撥朱絲絃哀玉不
可扣華觴徒湛然聞君東林卧郡閣曠周旋酬對龍象

侶灌注清泠泉如何無礙智猶苦病纏牽

晨興寄贈竇使君

江陵歲方晏晨起盼庭柯白露傷紅葉清風斷綠蘿狗
時真氣索念遠幽懷多夙昔東山意縱橫南浦波有美
嬋娟子百慮攢雙蛾絨情鬱不舒幽竹自駢羅為子歌
寒苦旨酒朱顏酡世事浮雲變功名將奈何

秋日對酒

行年過始衰秋至獨先悲事往悻神魄感深滋涕洟百

慮紛然在一醉兀無思寶瑟拂塵匣徽音凝朱絲幽圃
蕙蘭氣烟窻松桂姿我乏濟時畧杖節撫坤維山川大
兵後牢落空城池驚沙猶振野綠草生荒陂物變風雨
順人懷天地慈春耕俟秋戰戎馬去封陞波瀾暗超忽
堅白亦磷緇客有自嵩穎重徵栖隱期丹訣學仙晚白
雲歸谷遲君恩不可報霜露繞南枝

送唐次

都門去馬嘶灞水春流淺青槐驛路長白日離尊晚望

望烟景微草色行人遠

望夫石

佳人望夫處苔蘚封孤石
萬里水連天巴江暮雲碧
湘妃泣下竹成斑子規夜啼
江樹白

近體詩

西亭早秋送徐員外

鼎鉉辭台座麾幢領益州
曲池連月曉橫角滿城秋
有美皇華使曾同白社遊
今來重相見偏覺艷歌愁

送柳郎中裴起居

沱江水綠波喧鳥去喬柯南浦別離處東風蘭杜多長
亭春婉婉層漢路蹉跎會有歸朝日班超奈老何

八月十五日酬從兄常望月有懷

坐愛圓景滿况茲秋夜長寒光生露草夕韻出風篁地
遠驚金奏天高失雁行如何北樓望不得共池塘

春日與諸公汎舟

千里雪山開沱江春水來駐帆雲縹緲吹管鶴徘徊身

外流年駛樽前落景催不應歸棹遠明月在高臺

同洛陽諸公餞盧起居

蕭條寒日晏悽慘別魂驚寶瑟無聲怨金囊故贈輕赤
墀方載筆油幕尚言兵暮宿青泥驛煩君淚滿纓

江上寄隱者

歸舟不計程江月屢虧盈靄靄滄波路悠悠離別情兼
葭連水國鞀鼓近梁城却憶沿江叟汀洲春草生

送巖紳遊蘭溪

剡嶺窮邊海君遊到嶺西暮雲秋水濶寒雨夜猿啼地
僻秦人少山多越路迷蕭蕭驅匹馬何處是蘭溪

秋思

秋空浩烟霧風柳怨寒蛩機杼夜聲切蕙蘭芳意消美
人湘水曲桂檝洞庭遙常恐時光謝蹉跎紅艷凋

夏日別盧太卿

漢水清且廣江波渺復深葉舟烟雨夜之子別離心汀
草結春怨山雲連暝陰年年南北淚今古共沾襟

春夜與諸公同宴呈陸三十四郎中

南國宴佳賓交情老倍親
月慙紅燭淚花笑白頭人
寶瑟常餘怨瓊枝不讓春
更聞歌子夜桃李艷妝新

長安春望

宿雨淨烟霞春風綻百花
綠楊中禁路朱戟五侯家
草色金隄晚鶯聲御柳斜
無媒猶未達應共惜年華

秋夜寄江南舊游

寥落九秋晚端憂時物殘
隔林螢影度出禁漏聲寒
愁

雨洞房掩孤燈
遙夜闌懷賢夢
南國興盡水漫漫

送寇侍郎司馬之明州

斟酒上河梁
驚魂去越鄉
地窮滄海濶
雲入剡山長
蓮

唱蒲魚
熟人烟
橘柚香
蘭亭應
駐楫
今古共
風光

周禮職方

其利蒲魚盧綸詩同此
利蒲魚俗本作蒲荀欵

送李正字之蜀

已獻甘泉賦
仍登片玉科
漢官新組綬
蜀國舊烟蘿
劔
壁秋雲斷
巴江夜月多
無窮別離思
遙寄竹枝歌

夏日陪馮許二侍郎與嚴秘書遊昊天觀覽舊題

寄同里楊華州中丞

三伏草木變九城車馬煩碧霄迴騎射丹洞入桃源臺
殿雲浮棟綏纓鶴在軒莫將真破妄聊用靜持喧石甃
古苔冷水筠涼簟翻黃公壚下嘆旌旆國東門

奉酬淮南中書相公見寄

并序

皇帝改元之二年余與趙公同制入輔並為黃
門侍郎夏五月連拜弘文崇文大學士冬十月

詔授檢校吏部尚書兼門下侍郎彤弓旅矢出
鎮西蜀後九月趙公加大司馬之秩右弼如故
龍旗虎符出制淮海時號揚益俱為重藩左右
皇都萬里何遠公手提兵柄心匠化源芳詞賦
余情勤靡極質文相映金玉鏘然蜀道之阻長
楚郊之風物襟靈所屬盡在斯矣永懷趙公歲
寒交好之情因成詩人不可方思之義聊書匪
報以款遐心

揚州隋故都竹使漢名儒翊聖恩華異持衡節制殊朝
廷連受脤台座接訐謨金玉裁王度丹書奉帝俞九重
辭象魏十萬握兵符鐵馬秋臨塞虹旌夜渡瀘江長梅
笛怨天遠桂輪孤浩嘆烟霜曉芳期蘭蕙蕪雅言書一
札賓海雁東隅歲月奔波盡音徽霧雨濡蜀江分井絡
錦浪入淮湖獨抱相思恨關山不可踰

和楊弘微春日曲江南望

遲景靄悠悠傷春南陌頭暄風一澹蕩遐思幾殷憂龍

去空仙詔鶯飛掩妓樓芳菲餘雨露冠蓋舊公侯朱戟
千門閉黃鸝百轉愁烟濛宮樹晚花咽石泉流寒谷律
潛應中林蘭自幽高山將避漢晉室正藩周黍稷聞興
歎瓊瑤畏見投君心即吾事微尚在滄洲

長安秋夜懷陳京昆季

鐘鼓九衢絕出門千里同遠情高枕夜秋思北窓空靜
見烟凝燭間聽葉墜桐玉壺思洞徹瓊樹憶葱龍螢影
疎簾外鴻聲暗雨中羈愁難會面嬾慢責微躬甲乙科

攀桂圖書閣踐蓬一瓢非可樂六翮未因風寥落悲秋
盡蹉跎惜歲窮明朝不相見流淚菊花叢

冬日漢江南行將赴夏口途次江陵界寄裴尚書

五部擁雙旌南依墨客卿關山迴梁甸波浪接溢城烟
景迷時候雲帆渺去程蛤珠馮月吐蘆雁觸羅鷺浦樹
凝寒晦江天湛鏡清賞心隨處愜壯志逐年輕舟楫不
可駐提封如任情向方曾指路射策許言兵蘭渚歇芳
意菱歌非應聲元戎武昌守羊祜幸連營

甲午歲相國李公有北園寄贈之作吟翫歷時屢
從酬答機務不暇未及報章今古遽分電波增
感留墓劍而心許感鄰笛而意傷寓哀冥漠以

廣遺韻云

機事勞西掖幽懷寄北園
鶴巢深更靜蟬噪斷猶喧
仙醞百花馥艷歌雙哀翻
碧雲詩變雅皇澤葉流根
未報雕龍贈俄傷淚劍痕
佳城開白日哀挽去青門
禮命公台重烟霜隴樹繁
天高不可問空使輔星昏

和楊二舍人晚秋與崔二舍人張秘監苗考功同
遊昊天觀時中書寓直不得陪隨因追往年曾
與舊僚聯遊此觀紀題在壁已有淪亡書事感
懷輒以呈寄兼呈東省三給事之作楊君見徵
鄙詞因以繼和

瑤圃高秋會金闈奉詔辰朱輪天上客白石洞中人
珮響泉聲雜朝衣羽服親九重青瑣閉三秀紫芝新
化藥秦方士偷桃漢侍臣玉笙王子駕遼鶴令威身
嘆逝顏

波速絨詞麗曲春重將悽恨意苔壁問遺塵

秋懷奉寄朱補闕

上苑繁霜降騷人起恨初白雲深陋巷衰草遍間居暮
色秋烟重寒聲牖葉虛潘生秋思苦陶令世情疏已製
歸田賦猶陳諫獵書不知青瑣客投分竟何如

酬嚴維秋夜見寄

遙夜思悠悠聞鐘遠夢休亂林螢燭暗零露竹風秋啓
戶雲歸棟褰簾月上鉤昭明逢聖代羈旅別滄洲騎省

潘郎思衡門宋玉愁神仙慙李郭詞賦謝曹劉松栢應
無變瑤瑤不可酬誰堪此時景寂寞下高樓

途次近蜀驛蒙恩賜寶刀及飛龍殿馬使還因寄

中書李鄭二公

草草事行役遲遲故關碧幢遙隱霧紅旆漸依山感
激酬恩淚星霜去國顏捧刀金錫字歸馬玉連環威鳳
翔雙闕征夫護百蠻應憐宣室召溫樹不同攀

歸燕

春色遍芳菲，間簷雙燕歸。還同舊侶至，來遶故巢飛。敢
望烟霄達，多慙羽翮微。啣泥傍金砌，拾葢到荆扉。雲海
經時別，雕梁長日依。主人能一顧，轉盼自光輝。

聞相公三兄小園置宴以元衡寓直因寄上兼呈
中書三兄

休沐限中禁，家山傳勝遊。露寒潘省夜，木落庾園秋。蘭
菊迴幽步，壺觴洽舊儔。位高天祿閣，詞異畔牢愁。孤思
琴先覺，馳暉水競流。明朝不相見，清祀在園丘。

送崔判官使太原

勞君車馬此逡巡
我與劉君本世親
兩地山河分節制
十年京洛共風塵
笙歌幾處胡天月
羅綺長留蜀國春
報主末由須盡敵
相期萬里寶刀新

送張六諫議歸朝

詔書前日下丹霄
頭戴儒冠脫皂貂
笛怨柳營烟漠漠
雲愁江館雨瀟瀟
鴛鴦得路爭先翥
松桂凌寒識後凋
歸去朝端如有問
玉門關外老班超

酬嚴司空荆南見寄

金貂再入三公府，玉帳連封萬戶侯。
簾卷青山巫峽曉，烟開碧樹渚宮秋。
劉琨坐嘯風清塞，謝朓題詩月滿樓。
白雪調高歌不得，美人南望翠蛾愁。

南徐別業早春有懷

生涯擾擾竟何成，自愛深居隱姓名。
遠雁臨空翻夕照，殘雲帶雨過春城。
花枝入戶猶含潤，泉水侵階乍有聲。
虛度年華不相見，離腸懷土併關情。

摩訶池宴

摩訶池上春光早
愛水看花日日來
穠李雪開歌扇掩
綠楊風動舞腰回
燕臺事往空留恨
金谷時危悟惜才
晝短欲將清夜繼
西園自有月徘徊

春暮郊居寄朱舍人

幽深不謝子
真居度日間
眠世事踈
春水滿池新
雨霽
香風入戶落花餘
目隨鴻雁窮蒼翠
心寄烟雲任卷舒
回首知音青瑣闥
何時一爲薦相如

秋燈對雨寄史近崔積

坐聽宮城傳晚漏，起看衰葉下寒枝。
空庭綠草結離念，細雨黃花贈所思。
蟋蟀已驚良節度，茱萸偏憶故人期。
相逢莫厭樽前醉，春去秋來自不知。

春題龍門香山寺

衆香天上梵仙宮，鐘磬寥寥半碧空。
清景乍開松嶺月，亂流長響石樓風。
山河杳映春雲外，城闕參差曉樹中。
欲盡出尋那可得，三千世界本無窮。

酬談校書長安秋夜對月寄諸故舊

故園千里渺遐情
黃葉蕭條白露生
驚鵲遶枝風滿幌
寒鐘送曉月當楹
蓬山高價傳新韻
槐市芳年挹盛名
莫怪孔融悲歲序
五侯門館重婁卿

送田三端公還鄂州

孤雲迢遞戀滄洲
勸酒梨花對白頭
南陌送歸車騎合
東城怨別管絃愁
青油幕裏人如玉
黃鶴樓中月並鉤
君去庾公應借問
馳心千里大江流

春興

楊柳陰陰細雨晴
殘花落盡見流鶯
春風一夜吹香夢
又逐春風到洛城

重送盧三十一起居

相如擁傳有光輝
何事闌干淚濕衣
舊府東山餘妓在
重將歌舞送君歸

題嘉陵驛

悠悠風旆繞山川
山驛空濛雨似烟
路半嘉陵頭已白

蜀門西更上青天

摩訶池送李侍御之鳳翔

柳暗花明池上山
高樓歌酒換離顏
他時欲寄相思字
何處黃雲是隴關

渡淮

暮濤凝雪長淮水
細雨飛梅五月天
行子不須愁夜泊
綠楊多處有人烟

塞外月夜寄荆南熊侍御

南依劉表北劉琨征戰年年簫鼓喧雲雨一乖千萬里
長城秋月洞庭猿

同張惟送霍總赴池州

春風簫管怨津樓三奏行人醉不留別後相思江一岸
落花飛處杜鵑愁

羊士諤

士諤泰山人登貞元元年進士第元和初以省郎
貶資州刺史

順宗實錄云士諤初為宣歙巡官以公事至京遇
王叔文用事不能平公言其非叔文怒欲下詔斬
之韋執誼不可則令杖殺之又不可因貶汀州寧
化尉竇羣呂溫傳云羣溫與士諤險躁好竒趣尚
相狎羣為御史中丞欲引士諤與溫為知雜宰相
李吉甫持不下因共誣搆吉甫憲宗知其偽並貶
逐士諤得資州

徐獻忠曰士諤詩氣格昂然不落卑調然列之能

品亦蕭然微耳

古體詩

小園春至偶呈吏部竇郎中孟員外

松篠雖古節冰霜慘其間欣然發佳色如喜東風還幽
抱想前躅冥鴻度南山春臺一以眺達士亦解顏偃息
非老圃沈吟闋玄關馳暉忽復失壯歲不得間君子當
濟物丹梯誰共攀心期自有約去掃蒼苔斑

九月十日邵樓獨酌

掾吏當授衣郡中稀物役嘉辰悵已失殘菊誰為惜
樽軒一樽汎天景洞虛碧暮節獨賞心寒江鳴湍石歸期
北州里舊友東山客飄蕩雲海深相思桂花白

近體詩

郡中翫月寄江南李少尹虞部孟員外

月滿自高丘江通無狹流軒窓開到曉風物坐含秋
鷲警銀河斷蛩悲翠幕幽清光望不極耿耿下西樓

桂華臨洛浦如挹李膺仙茲夕披雲望還吟擲地篇鳳

池分直夜牛渚泛舟年會是風流賞惟君內史賢

圓景曠佳賓徘徊夜漏頻金波徒汎酒瑤瑟已生塵露

白移長簟風清掛幅中西園舊才子想見洛陽人

時杜
盧雲

夫書分

司入洛

乾元初嚴黃門自京兆少尹貶牧巴郡以長才英

氣因多暇日每遊郡之東山山側精舍有盤石

細泉疏為流盃之勝苔深樹老蒼然遺躅士諤

謬因出守得繼茲賞乃賦詩十四韻刻於石壁

石座雙峯古雲泉九曲深寂寥
䟽鑿意蕪沒歲時侵遠

席流還壅浮杯咽復沈
追懷王謝侶更似會稽岑

始詣流杯

之地蔓草已沒石泉渠不絕如線躬自䟽導終日游潺湲問諸水濱蓋數十年無復遊者

誰謂天池翼

相期澤畔吟光輝輕尺璧然諾重黃金
幾醉東山妓長

懸北闕心蕙蘭留雜佩桃李想華簪

時祁詹事昂自拾遺貶清化尉黃門

年三十餘且為府主與祁意氣友善賦詩高會文字猶存

閑閣余何事鳴騶亦屢尋

軒裳遵往轍風景憇中林
橫吹多悽調安歌送好音
初

筵方側弁故老忽沾襟

時老僧常覺在自言日瞻黃門遊集之日匪歷可聽及聞絲竹

發聲泣然流涕云速此
五十餘年想見故事

盛世當弘濟平生諒所欽無能

愧陳力惆悵拂瑤琴

郡中即事

曉風山郭雁飛初霜拂回塘水榭虛鼓角清明如戰壘
梧桐搖落似貧居青門遠憶中人產白首間看太史書
城下秋江寒見底賓筵莫訝食無魚

亂後曲江

憶昔曾遊曲水濱春來長有探春人遊春人盡空池在

直至春深不似春

彭州蕭使君出妓夜宴見送

玉顏紅燭忽驚春
微步凌波暗拂塵
自是當歌歛眉黛
不應惆悵為行人

翫荷花

紅衣落盡暗香殘
葉上秋光白露寒
越女含情已無限
莫教長裊倚欄干

王學士獨遊青龍寺翫紅葉因贈

十畝蒼苔繞畫廊
幾株紅樹過青霜
高情還似看花去
閒對南窓步夕陽

張碧

碧字大碧貞元中人自序其詩云碧嘗讀李長吉
集謂春拆紅翠霹靂開蟄戶其奇峭者不可及也及
覽李太白詞天與俱高青且無際鷗觸巨海瀾濤
怒翻則觀長吉之篇若陟嵩之巔視諸阜者邪余
嘗銳志狂勇心魄恨不得攤文陣以交鋒覩拔戟

挾輶而已

古體詩

秋日登岳陽樓晴望

三秋倚練飛金盞
洞庭波定平如剡
天高雲卷綠蘿低
一點君山礙人眼
漫漫萬頃鋪琉璃
烟波濶遠無鳥飛
西南東北競無際
直疑浸斷青天涯
屈原回日牽愁吟
龍宮感激致應沈
賈生憔悴說不得
茫茫烟靄堆湖心

鴻溝

毒龍銜日天地昏八紘黶黶生愁雲秦原走鹿無藏處
紛紛爭處蜂成羣四溟波立鯨相吞蕩搖五岳崩山根
魚蝦舞浪狂鯁鯁龍蛇膽戰登鴻門星旗羽鏃強者尊
黑風白雨東西屯山河欲拆人烟分壯士鼓勇君王存
項莊憤氣吐不得亞父斟聲天上聞玉光墮地驚崑崙
留侯氣魄吞太革舌頭一寸生陽春神農女媧愁不言
蛇枯老媪啼淚痕星曹定秤秤王孫項籍骨輕迷精魂
沛公仰面爭乾坤須臾垓下賊星起歌聲繚繞悽人耳

吳娃捧酒橫秋波，霜天月照空城壘。
力拔山兮忽到此，騅嘶嬾渡烏江水。
新豐瑞色生樓臺，西楚寒蒿哭愁鬼。
三尺霜鳴金匣裏，神光一照八千里。
漢皇駿馬意氣生，西南掃地迎天子。

美人梳頭

玉堂花院小枝紅，綠牕一片春光曉。
玉容驚覺濃睡醒，圓蟾挂出妝臺表。
金盤解下叢鬟碎，三尺巫雲綰朝翠。
皓指高低寸黛愁，水精梳滑參差墜。
須臾攏掠蟬鬢生。

玉釵冷透冬冰明芙蓉拆向新開臉秋泉慢轉眸波橫
鸚鵡偷來話心曲屏風半倚遙山綠

題祖山人池上怪石

寒姿數片竒突兀曾作秋江秋水骨先生應是厭風雷
著向江邊塞龍窟我來池上傾酒樽半酣書破青烟痕
參差翠縷擺不落筆頭驚怪粘秋雲我聞吳中項容水
墨有高價邀得將來倚松下鋪却雙繒直道難掉首空
歸不成畫



御定全唐詩錄卷五十七

欽定四庫全書

集部

御定全唐詩錄卷五十八

詳校官左中允_臣 瑋五珠

主事銜_臣 徐以坤復勘

總校官原任中允_臣 王燕緒

校對官中書_臣 田尹衡

謄錄監生_臣 馮堪

欽定四庫全書

御定全唐詩錄卷五十八

白居易

居易字樂天其先蓋太原人後徙下邳居易敏悟
絕人工文章未冠謁顧況况吳人恃才少所推可
覩姓名熟視曰長安米貴居大不易及讀其芳草
詩至野火燒不盡春風吹又生嘆曰吾謂斯文遂
絕今復得子矣貞元中擢進士拔萃皆中補校書

郎元和元年對制策乙等調監屋尉為集賢校理
月中召入翰林為學士遷左拾遺歲滿當遷帝以
資淺且家素貧聽自擇官居易請如姜公輔以學
士兼京兆戶曹參軍以便養詔可明年以母喪解
還拜左贊善大夫是時盜殺武元衡京兆震擾居
易首上疏請亟捕賊刷朝廷恥以必得為期宰相
嫌其出位不悅俄有言居易母墮井死而居易賦
新井篇言浮華無實行不可用出為州刺史中書

舍人王涯上言不宜治郡追貶江州司馬既失志
能順適所遇託浮屠生死說若忘形骸者久之徙
忠州刺史入為司門員外郎以主客郎中知制誥
俄轉中書舍人旬外遷為杭州刺史久之以太子
左庶子分司東都復拜蘇州刺史病免文宗立以
秘書監召遷刑部侍郎封晉陽縣男太和初二李
黨事興險利乘之更相奪移進退毀譽若旦暮然
楊虞卿與居易姻家而善李宗閔居易惡緣黨人

升乃移病還東都除太子賓客分司開成初起為
同州刺史不拜改太子少傅進馮翊縣侯會昌初
以刑部尚書致仕六年卒年七十五贈尚書右僕
射宣宗以詩吊之遺命薄塋母請謚與弟行簡從
祖弟敏中友愛東都所居履道里疏沼種樹構石
樓香山鑿八節灘自號醉吟先生為之傳暮節惑
浮屠道尤甚至經月不食葷稱香山居士嘗與胡
杲等燕集皆高年不事者人慕之繪為九老圖居

易於文章精切然最工詩頗以規諷得失及其多
更下偶俗好至數千篇當時士人爭傳雞林行賈
售其國相率篇易一金其偽者相輒能辨之初與
元稹酬詠故號元白稹卒又與劉禹錫齊名號劉
白其始生七月能展書姆指之無兩字雖試百數
不差九歲暗識聲律其篤於文章蓋天稟然敏中
為相請謚有司曰文後履道第卒為佛寺東都江
州民為立祠焉

元稹長慶集叙云揚越間多作書模勒樂天及余雜詩賣於市肆之中又云余嘗於平水市中見邨校諸童競習詩召而問之皆對曰先生教我樂天微之詩固亦不知余之為微之也

居易與元稹書云間親友間說禮吏部舉選人多以僕私試賦判傳為準的其餘詩句一本徃徃在人口中及再來長安又聞有軍使高霞寓者欲聘倡妓妓大誇曰我誦得白學士長恨歌豈同他妓哉由

是增價又足下書云到通州日見江館柱間有題
僕詩者復何人哉又昨過漢南日適遇主人集衆
樂娛他賓諸妓見僕來指而相顧曰此是秦中吟
長恨歌主耳自長安抵江西三四千里凡鄉校佛
寺送旅行舟之中徃徃有題僕詩者士庶僧徒孀
婦處女之口每每有詠僕詩者此誠雕蟲之戲不
足為多然今時俗所重正在此耳

通攷晁氏云居易在杭州自類詩彙分諷諭閒適

感傷雜律四類前集五十卷後集二十卷

墨客揮犀云樂天每作詩令一老嫗解之問曰解
否嫗曰解則錄之不解則不復集故唐末之弊至
俚

全唐詩話云樂天不為贊皇公所喜每寄文章李
絨之一筐未嘗開劉夢得或請之曰見詞則迴吾
心矣

古體詩

賀雨

皇帝嗣寶歷元和三年冬自冬及春暮不雨旱熯熯上
心念下民懼歲成災凶遂下罪已詔殷勤制萬邦帝曰
余一人繼天承祖宗憂勤不遑寧夙夜心忡忡元年誅
劉闢一舉靖巴邛二年戮李錡不戰安江東顧惟眇眇
德遽有巍巍功或者天降沴無乃倣余躬上思答天戒
下思致時邕莫如率其身慈和與儉恭乃命罷進獻乃
命賑饑窮宥死降五刑已責寬三農宮女出宣徽廄馬

減飛龍庶政靡不舉皆由自宸衷奔騰道路人偃僂田
野翁歡呼相告報感泣涕沾眉順人人心悅先天天意
從詔下纔七日和氣生冲融凝為悠悠雲散作習習風
晝夜三日雨淒淒復濛濛萬心春熙熙百穀青芄芃人
變愁為喜歲易儉為豐乃知王者心憂樂與眾同皇天
與后土所感無不通冠佩何鏘鏘將相及王公蹈舞呼
萬歲列賀明庭中小臣誠愚陋職忝金鑾宮稽首再三
拜一言獻天聰君以明為聖臣以直為忠敢賀有其始

亦願有其終

夢仙

人有夢仙者夢身升上清坐乘一白鶴前引雙紅旌羽
衣忽飄飄玉鸞俄錚錚半空直下視人世沈冥冥漸失
鄉國處纔分山水形東海一片白列岳五點青須臾羣
仙來相引朝玉京安期羨門輩列侍如公卿仰謁玉皇
帝稽首前致誠帝言汝仙才努力勿自輕却後十五年
期汝不死庭再拜受斯言既寤喜且驚秘之不敢泄誓

志居巖扃恩愛捨骨肉飲食斷羶腥朝殮雲母散夜吸
沉瀝精空山三十載日望輜輶迎前期過已久鸞鶴無
來聲齒髮日衰白耳目減聰明一朝同物化身與糞壤
并神仙信有之俗力非可營苟無金骨相不列丹臺名
徒傳辟穀法虛受燒丹經只自取勤苦百年終不成悲
哉夢仙人一夢誤一生

觀刈麥

時為盩厔縣尉

田家少閒月五月人倍忙夜來南風起小麥覆隴黃婦

姑荷簞食童稚攜壺漿相隨餉田去
丁壯在南崗足蒸暑土氣背灼炎天光
力盡不知熱但惜夏日長復有貧婦人
抱子在其傍右手秉遺穗左臂懸弊筐
聽其相顧言聞者為悲傷家田輸稅盡
拾此充饑腸今我何功德曾不事農桑
吏祿三百石歲宴有餘糧念此私自愧
盡日不能忘

題海圖屏風

元和巳丑年作

海水無風時波濤安悠悠鱗介無小大
遂性各沈浮突

兀海底鼇首冠三神丘釣網不能制其來非一秋或者
不量力謂茲鼇可求鼃屬牽不動綸絕沈其鈎一鼇既
頓頷諸鼇齊掉頭白濤與黑浪呼吸繞咽喉噴風激飛
廉鼓波怒陽侯鯨鯢得其便張口欲吞舟萬里無活鱗
百川多倒流遂使江漢水朝宗意亦休蒼然屏風上此
畫良有由

羸駿

驂騑失其主羸餓無人牧向風嘶一聲莽蒼黃河曲躡

冰水畔立卧雪塚間宿歲暮田野空寒草不滿腹豈無
市駿者盡是凡人目相馬失於瘦遂遺千里足邨中何
擾擾有吏徵芻粟淪彼軍廢中化作駑駘肉

廢琴

絲桐合為琴中有太古聲古聲淡無味不稱今日情玉
徽光彩滅朱絃塵土生廢棄來已久遺音尚泠泠不辭
為君彈縱彈人不聽何物使之然羌笛與秦箏

李都尉古劍

古劍寒黯黯鑄來幾千秋白光納日月紫氣排斗牛有
客借一觀愛之不敢求湛然玉匣中秋水湛不流至寶
有本性精剛無與儔可使寸寸折不能繞指柔願快直
士心將斷佞臣頭不願報小怨夜半刺私讐勸君慎所
用無作神兵羞

雲居寺孤桐

一株青玉立千葉綠雲委亭亭五丈餘高意猶未已山
僧年九十清淨老不死自云手種時一顆青桐子直從

萌芽拔高自毫末始四面無附枝中心有通理寄言立
身者孤直當如此

京兆府新栽蓮

時為盤屋縣尉趨府作

汚溝貯濁水水上葉田田我來一長嘆知是東溪蓮下
有清泥汚馨香無復全上有紅塵撲顏色不得鮮物性
猶如此人事亦宜然託根非其所不如遭棄捐昔在溪
中日花葉媚清漣今來不得地願頓府門前

初授拾遺

奉詔登左掖束帶叅朝議何言初命卑且脫風塵吏社
甫陳子昂才名括天地當時非不遇尚無過斯位況予
蹇薄者寵至不自意驚近白日光慙非青雲器天子方
從諫朝廷無忌諱豈不思匪躬適遇時無事受命已旬
月飽食隨班次諫紙忽盈箱對之終自愧

贈元稹

自我從宦遊七年在長安所得惟元君乃知定交難豈
無山上苗徑寸無歲寒豈無要津水咫尺無波瀾之子

異於是久處誓不諼無波古井水有節秋竹竿一為同心友三及芳歲闌花下鞍馬遊雪中杯酒歡衡門相逢迎不具帶與冠春風日高睡秋月夜深看不為同登科不為同署官所合在方寸心源無異端

宿紫閣山北邨

晨遊紫閣峯暮宿山下邨村老見予喜為予開一尊舉杯未及飲暴卒來入門紫衣挾刀斧草草十餘人奪我席上酒掣我盤中殮主人退後立斂手反如賓中庭有

奇樹種來三十春主人惜不得持斧斷其根口稱采造
家身屬神策軍主人慎勿語中尉正承恩

蜀路石婦

道傍一石婦無記亦無銘傳是此鄉女為婦孝且貞十
五嫁邑人十六夫征行夫行二十載婦獨守孤孀其夫
有父母老病不安寧其婦執婦道一一如禮經晨昏問
起居恭順發心誠藥餌自調節餼羞必甘馨夫行竟不
歸婦德轉光明後人高其節刻石像婦形儼然整衣巾

若立在閨庭似見舅姑禮如間環珮聲至今為婦者見
此孝心生不比山頭石空有望夫名

折劍頭

拾得折劍頭不知拾之由一握青蛇尾數寸碧峯頭疑
是斬鯨鯢不然刺蛟虬缺落泥土中委棄無人收我有
鄙介性好剛不好柔勿輕直折劍猶勝曲全鉤

登樂遊園望

獨上樂遊園四望天日曛東北何靄靄宮闕入煙雲愛

此高處立忽如遺垢氛耳目暫清曠懷抱鬱不伸下視
十二街綠樹間紅塵車馬徒滿眼不見心所親孔生死
洛陽元九謫荆門可憐南北路高蓋者何人

感鶴

鶴有不羣者飛飛在野田饑不啄腐鼠渴不飲盜泉貞
姿自耿介雜鳥何翩翩同遊不同志如此十餘年一興
嗜慾念遂為矰繳牽委質小池內爭食羣雞前不惟懷
稻粱兼亦競腥羶不惟戀主人兼亦狎鳥鳶物心不可

知天性有時遷一飽尚如此况乘大夫軒

白牡丹

和錢學士作

城中看花客旦暮走營營素華人不顧亦占牡丹名
開在深寺中車馬無來聲唯有錢學士盡日遶叢行
憐此皓然質無人自芳馨衆嫌我獨賞移植在中庭
留景夜不暝迎光曙先明對之心亦靜虛白相向生
唐昌玉蕊花攀翫衆所爭折來比顏色一種如瑤瓊
彼因稀見貴此以多為輕始知無正色愛惡隨人情
豈惟花獨爾理

與人事并君者入眼者紫艷與紅英

贈內

生為同室親死為同穴塵他人尚相勉而況我與君黔
婁固窮士妻賢忘其貧冀缺一農夫妻敬儼如賓陶潛
不營生翟氏自爨薪梁鴻不宦仕孟光甘布裙君雖不
讀書此事耳亦間至此千載後傳是何如人人生未死
間不能忘其身所須者衣食不過飽與溫蔬食足充饑
何必嘗膏珍繒絮足禦寒何必錦繡文君家有遺訓清

白貽子孫我亦貞苦士與君新結婚庶保貧與素偕老
同欣欣

寄唐生

賈誼哭時事阮籍哭路岐唐生今亦哭異代同其悲唐
生者何人五十寒且饑不悲口無食不悲身無衣所悲

忠與義悲甚則哭之太尉擊賊日

段太尉以笏擊朱泚

尚書叱盜

時

顏尚書叱李希烈

大夫死充寇

陸大夫為亂兵所害

諫議謫蠻夸

楊諫議左

遷道州

每見如此事聲發涕輒隨往往間其風俗士猶或

非憐君頭半白其志竟不衰我亦君之徒鬱鬱何所為
不能發聲哭轉作樂府詩篇篇無空文句句必盡規功
高虞人箴痛甚騷人辭非求宮律高不務文字奇惟歌
生民病願得天子知未得天子知甘受時人唾藥良氣
味苦琴淡音聲稀不懼權豪怒亦任親朋譏人竟無奈
何呼作狂男兒每逢羣盜息或遇雲霧披但自高聲歌
庶幾天聽卑歌哭雖異名所感則同歸寄君三十章與
君為哭詞

傷唐衢

自我心存道外物少能逼常排傷心事不為長嘆息忽
間唐衢死不覺動顏色悲端從東來觸我心惻惻伊昔
未相知偶遊滑臺側同宿李翱家一言如舊識酒酣出
送我風雪黃河北日西並馬頭語別至昏黑君歸向東
鄭我來遊上國交心不交面從此重相憶憐君儒家子
不得詩書力五十著青衣試官無祿食遺文僅千首六
義無差忒散在京洛間何人為收拾

憶昨元和初忝備諫官位是時兵革後生民正憔悴但
傷民病痛不識時忌諱遂作秦中吟一吟悲一事貴人
皆怪怒間人亦非訾天高未及聞荆棘生滿地唯有唐
衢見知我平生志一讀興嘆嗟再吟垂涕泗因和三
十韻手題遠緘寄致吾陳杜間賞愛非常意此人無復見
此詩猶可貴今日開篋看蠹魚損文字不知何處葬欲
問先歔歔終去哭墳前還君一掬淚

陳杜謂子昂與甫也此詩猶可貴謂

唐衢
詩也

問友

種蘭不種艾蘭生艾亦生根
艾相交長莖葉相附榮香
莖與臭葉日夜俱長大
鋤艾恐傷蘭溉蘭恐滋艾
蘭亦未能溉艾亦未能除
沈吟意不決問君欲何如

紫藤

藤花紫蒙茸藤葉青扶疎
誰謂好顏色而為害有餘
下如蛇屈盤上若繩縈紆
可憐中間樹束縛成枯株
柔蔓不自勝嫋嫋挂空虛
豈知纏樹木千夫力不如
先柔後

為害有似諛佞徒附著君權勢君迷不肯誅又如妖婦
人綢繆蠱其夫竒邪壞人室夫惑不能除寄言邦與家
所慎在其初毫末不早辨滋蔓信難圖願以藤為戒銘
之於座隅

燕詩示劉叟

并序

叟有愛子背叟逃去叟甚悲念之叟少年亦嘗
如是故作燕詩以諭之

梁上有雙燕翩翩雄與雌銜泥兩椽間一巢生四兒四

兒日夜長索食聲孜孜青蟲不易捕黃口無飽期嘴爪
雖欲斃心力不知疲須臾干來往猶恐巢中饑辛勤三
十日母瘦雛漸肥喃喃教言語一一刷毛衣一旦羽翼
成引上庭樹枝舉翅不回顧隨風四散飛雌雄空中鳴
聲盡呼不歸却入空巢裏啁啾終夜悲燕燕爾勿悲爾
當返自思思爾為雛日高飛背母時當時父母念今日
爾應知

采地黃者

麥死春不雨禾損秋早霜歲晏無口食田中采地黃米
之將何用持以易餽糧凌晨荷鋤去薄暮不盈筐攜來
朱門家賣與白面郎與君啖肥馬可使照地光願易馬
殘粟救此苦饑腸

鄧魴張徹落第

古琴無俗韻奏罷無人聽寒松無妖花枝下無人行春
風十二街軒騎不暫停奔車看牡丹走馬聽秦箏衆目
悅芳艷松獨守其貞衆耳喜鄭衛琴亦不改聲懷哉二

夫子念此無自輕

送王處士

王門豈無酒侯門豈無肉主人貴且驕待客禮不足望
塵而拜者朝夕走碌碌王生獨拂衣遐舉如雲鵠寧歸
白雲外飲水卧空谷不能隨衆人斂手低眉目扣門與
我別沽酒留君宿好去採薇人終南山正綠

諭友

昨夜霜一降殺君庭中槐乾葉不待黃索索飛下來憐

君感物節晨起步前堦臨風蹋葉立半日顏色哀西望
長安城歌鐘十二街何人不歡樂君獨心悠哉白日頭
上走朱顏鏡中顏平生青雲心銷化成死灰我今贈一
言勝飲酒千杯其言雖甚鄙可破悒悒懷朱門有勲貴
陋巷有顏回窮通各有命不繫才不才推此自裕裕不
必待安排

新製布裘

桂布白似雪吳綿軟於雲布重綿且厚為裘有餘溫朝

擁坐至暮夜覆眼達晨誰知嚴冬月支體暖如春中夕
忽有念撫裘起逡巡大夫貴兼濟豈獨善一身安得萬
里裘益裹周四垠穩暖皆如我天下無寒人

放魚

自此後詩
到江州作

曉日提竹籃家僮買春蔬青青芹蕨下疊卧雙白魚無
聲但呀呀以氣相煦濡傾籃寫地上撥刺長尺餘豈惟
刀几憂坐見螻蟻圖脫泉雖已久得水猶可蘇放之小
池中且用救乾枯水小池窄狹動尾觸四隅一時幸苟

活久遠將何如憐其不得所移放於南湖南湖連西江
好去勿踟躕施恩即望報吾非斯人徒不須泥沙底辛
苦覓明珠

潯陽三題

并序

廬山多桂樹湓浦多脩竹東林寺有白蓮花皆
植物之貞勁秀異者雖宮園省寺中未必能盡
有夫物以多為賤故南方人不貴重之至有蒸
爨其桂剪棄其竹白眼於蓮花者予惜其不生

於北土也因賦三題以唁之

廬山桂

偃蹇月中桂結根依青天
天風繞月起吹子下人間
飄零委何處乃落匡廬山
生為石上桂葉如剪碧
鮮枝幹日長大根茲日
牢堅不歸天上月空老
山中
年廬山去咸陽道里三
四千無人為移植得入
上林園不及紅花樹長
栽温室前

湓浦竹

潯陽十月天天氣仍溫燠有霜不殺草有風不落木玄
冥氣力薄草木冬猶綠誰肯溢浦頭迴眼看脩竹其有
顧盼者持刀斬且束剖劈青琅玕家家葢墻屋吾聞汾
晉間竹少重如玉胡為取輕賤生此西江曲

東林寺白蓮

東林北塘水湛湛見底清中生白芙蓉菡萏三百莖白
日發光彩清飈散芳馨洩香銀囊破瀉露玉盤輕我慙
塵埃眼見此瓊瑤英乃知紅蓮花虛得清淨心夏萼敷

未歇秋芳結纔成夜深衆僧寢獨起繞池行欲收一顆
子寄向長安城但恐出山去人間種不生

秦中吟十首

并序

貞元元和之際予在長安聞見之間有足悲者
因直歌其事命為秦中吟

議婚

天下無正聲悅耳即為娛人間無正色悅目即為姝顏
色非相遠貧富則有殊貧為時所棄富為時所趨紅樓

富家女金縷繡羅襦見人不斂手嬌癡二八初母兄未
開口已嫁不須臾綠窻貧家女寂寞二十餘荆釵不直
錢衣上無真珠幾回人欲聘臨日又踟躕主人會良媒
置酒滿玉壺四座且勿飲聽我歌兩途富家女易嫁嫁
早輕其夫貧家女難嫁嫁晚孝於姑聞君欲娶婦娶婦
意何如

重賦

厚地植桑麻所要濟生民生民理布帛所求活一身身

外充征賦上以奉君親國家定兩稅本意在愛人厥初
防其淫明敕內外臣稅外加一物皆以枉法論奈何歲
月久貪吏得因循浚我以求罷斂索無冬春織絹未成
足縑絲未盈斤里胥迫我納不許暫逡巡歲暮天地閉
陰風生破村夜深烟火盡霰雪白紛紛幼者形不蔽老
者體無溫悲喘與寒氣併入鼻中辛昨日輸殘稅因窺
官庫門繒帛如山積絲絮似雲屯號為羨餘物隨月獻
至尊奪我身上暖買爾眼前恩進入瓊林庫歲久化為

塵

傷宅

誰家起甲第朱門大道邊
豐屋中櫛比高墻外迴環
累累六七堂棟宇相連延
一堂費百萬鬱鬱起青烟
洞房溫且清寒暑不能干
高堂虛且迴坐卧見南山
繞廊紫藤架夾砌紅藥欄
攀枝摘櫻桃帶花移牡丹
主人此中坐十載為大官
厨有臭敗肉庫有貫朽錢
誰能將我語問爾骨肉間
豈無貧賤者忍不救饑寒
如何奉一身直

欲保千年不見馬家宅今作奉誠園

傷友

陋巷孤寒士出門苦棲棲雖云志氣在豈免顏色低平生同門友通籍在金閨曩者膠漆契爾來雲雨睽正逢下朝歸軒騎五門西是時天久陰三日雨淒淒蹇驢避路立肥馬當風嘶迴頭忘相識占道上沙堤昔年洛陽社貧賤相提攜今日長安道對面隔雲泥近日多如此非君獨慘悽死生不變者惟聞任與黎

任公孫黎逢

不致仕

七十而致仕禮法有明文何乃貪榮者斯言如不聞可
憐八九十齒墮雙眸昏朝露貪名利夕陽憂子孫掛冠
顧翠綵懸車惜朱輪金章腰不勝偃僕人君門誰不愛
富貴誰不戀君恩年高須告老名遂合退身少時共唾
銷晚歲多因循賢哉漢二疏彼獨是何人寂寞東門路
無人繼去塵

立碑

勲德既下哀文章亦陵夷但見山中石立作路傍碑銘
勲悉太公叙德皆仲尼復以多為貴千言值萬賢為文
彼何人想見下筆時但欲愚者悅不思賢者嗤豈獨賢
者嗤仍傳後代疑古石蒼苔字安知是愧詞我聞望江
縣麴令撫孳孳麴令名信陵在官有仁政名不聞京師身歿
欲歸葬百姓遮路歧攀轅不得去留葬此江湄至今道其
名男女涕皆垂無人立碑碣唯有邑人知

輕肥

意氣驕滿路鞍馬光照塵借問何為者人稱是內臣朱
紱皆大夫紫綬或將軍誇赴軍中宴走馬去如雲罇罌
溢九醞水陸羅八珍果擘洞庭橘膾切天池鱗食鮑心
自若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當胸撫大
聲簾若散颯颯風和雨小聲細欲絕切切鬼神語又如
鵲報喜轉作猿啼苦十指無定音顛倒宮徵羽坐客聞

此聲形神若無主行客聞此聲駐足不能舉嗟嗟俗人
耳好今不好古所以綠窻琴日日生塵土

歌舞

秦城歲云暮大雪滿皇州雪中退朝者朱紫盡公侯貴
有風雪興富無饑寒憂所營惟第宅所務在追遊朱門
車馬客紅燭歌舞樓歡酣促密坐醉暖脫重裘秋官為
主人廷尉居上頭日中為一樂夜半不能休豈知閹無分
切鄉獄中有凍死囚

買花

帝城春欲暮喧喧車馬度
共道牡丹時相隨買花去
貴賤無常價酬直看花數
灼灼百朵紅芟芟五束素
上張幄幕庇旁織笆籬
護水灑復泥封移來色如故
家家習為俗人人迷不悟
有一田舍翁偶來買花處
低頭獨長歎此歎無人喻
一叢深色花十戶中人賦

御定全唐詩錄卷五十八